

新纂雲南通志卷四十八目錄

地理考二十八

古蹟一

雲南府



新纂雲南通志卷四十八

地理考二十八

古蹟一



古賢之流風遺韻傳及後世推屋及烏地以人傳又名勝之區匠心經營雖或有附會傳說者猶可以發思古之幽情茲考地理於各類建置之後次之以古蹟即此意也

雲南府

昆明縣

建伶廢縣 在城西北漢縣屬益州郡蜀漢屬建寧郡晉太安二年分建寧置益州郡治於此永嘉末改為晉寧郡宋元嘉十八年晉寧太守爨松子叛寧州刺史徐循討平之齊亦為晉寧郡治梁氏

新纂雲南通志

卷四十八 地理考二十八 古蹟一

乃沒於蠻明通志

道光志案建伶故城志載城池此載廢縣舊地義各有當非復出其文亦詳略互見參觀自明餘倣此案兩漢志宋齊志晉太康地記並有建伶縣晉書地理志有冷邱無建伶華陽國志晉寧郡有建伶縣建寧郡有冷邱縣是一是二疑不能明洪亮吉東晉疆域志以為冷邱即建伶亦無據茲仍從舊志列建伶廢縣於昆明縣下而別疏所見於建置考釋中

穀昌廢城 在城北七里漢置縣後廢雍正志

按樊綽書拓東城之東十餘里有穀昌村漢穀昌王故地此道光志所本而明一統志謂苴蘭城即穀昌城道光志但書穀昌而不書苴蘭者以兩漢地理志故苴蘭皆屬牂牁郡故也今仍從道光志不列苴蘭廢縣而疏其故於此

廢昆州 在城西關內即舊益寧縣隋置尋廢唐武德元年復置後

廢雍正志

益寧廢縣 在城西唐時昆州治也唐志昆州所領有益寧等縣後

廢師範演繁

官渡廢縣 元時置尋廢入昆明縣明通志在城東南二十里雍正志

雲南廢衛 中衛在縣城北隅世恩坊左衛在五華山後右衛在縣



學西前衛在府治西南後衛在府治東南俱明洪武十五年置清  
康熙九年俱省二十二年復設左右二衛二十六年復省又廣南  
衛明洪武二十九年建於廣南府永樂元年遷於府治東清一統志  
牛井 在羅漢山巖下明嘉靖初趙道人修煉於此苦無水以牛載  
汲垂二十餘年一日牛忽死其處即湧一池味甚甘冽雖盛暑不

竭康熙志

漢學基 在城內雍正志漢元封元年南略昆明二年使韓悅開益州授

經教學故雲南有古漢學基焉南中志

清侯井 在布政司內段思廉封高智昇為鄯闡演習號清侯鑿井

得泉因而名之景泰志

梁王堆 在城外老崔橋歸化寺諸處昔有人發之得古匣一雍正志

新纂雲南通志

卷四十八 地理考二十八 古蹟一

二

梁王宮 在城內元末梁王把匝刺瓦爾密建明初改岷王府今廢

雍正志

幹耳朵元梁王離宮 在城東五里道光志

按察使李鑾宣幹耳朵

殷春門外草如莎落落長松掛女羅蕭鼓影沈瀟水咽珮環聲香月明多離宮址傍金稜家弱女悲銜鐵立歌一代興亡青史在不須荆棘感銅駝

梁王閣 在碧雞山下久廢道光志

沐氏別業 在城九龍池隅明沐氏有別業在其上號曰柳營清一統志

嵩明州知州烏程嚴遂成菜海弔沐氏別業

黔寧開國初夙夜懷靡及繼世不永年定遠戰屢捷三傳逮莊襄著有玉罔集漸漸文字起稍稍武功輯宴安嫖鳩毒臺觀水中立五華山環之風雨興離合紅絨吸奮鑑碧漪熨衣褶壁殘狎客並搖扇蠻奴夾吻場頭倒刺歌筵腰反貼沃以金澡鑪胸廁焚艾納多藏鬼瞰室甚固盜賊闖然沙定洲夕至朝以入灰燼落池寒九龍夜深泣珠沈魚網利釵斷牧鋤拾玉啼便蟲悽紺唾縮落澀何處是文樓鴛鴦瓦沙塵菜圃不收魂曬乾金玉蝶海果變為田盛衰閱雙塔平演數諸將穎川朝露濼藍獄禍連梁幾人保世業綿衍至天波石鏹揮摺脅無廢厥祖勳終始光史牒三百六十區剗除龍漢劫此意問水灌荷花笑不達



### 泗水知縣昆明孫鵬訪沐氏九龍池別業

伊人日以遙刺蹟日以變盈盈一水間白石參差欄築堤穿池心堤斷小橋貫曲引至東陸羅連雲九十九龍子爭居池澎澎人亦雜龍處臺榭浮水面垂柳間垂楊疏密圍斜岸蕭然一畝宮久為僧所戀遺址是耶非碧流淨如練落花掩寺門蕭蕭疏雨濺何人種菡萏千朵紅於茜花間鷓鴣飛雙雙去復轉斷霞霏衣濕微風吹暑散把酒酬伊人涕下欲如霰

### 海莊 在高嶢山下明楊慎謫演僑居於此清一統志

### 楊娥酒市故址 在城西市道光志

### 王思訓當壚曲並序

楊娥者楊鵝頭小妹也楊世為黔府武藝教習娥習藝過諸兄年十六適張氏張亦黔府武衛沐國公西走兩家以族隨會吳三桂執永明王張道死娥隨兄歸恨三桂入骨永明遇害娥遂日以殺吳為念而苦其難近娥固美豔計惟色疊行刺愛賣酒城西市飾肆六斷鴛鴦下云便犬出入時吳藩多執袴子弟見少婦靚妝當壚日引羣惡諷娥窺其尤桀者提投狗寶沸湯澆之羣驚起來捉娥早躍出立街中羣聚圍娥復躍出立圍外奮其技勇當之無不披靡羣復譁擊娥以先金約臂鐵錮層端逼近橫掉之各破身首負痛去明日聚惡少來報娥卓立不動衆亦憚其能不敢動鄉人就飲娥正色拒之人悟不忍犯吳稍稍得聞納有日矣娥忽中寒病而死今過酒肆故址父老每為余言因作歌以紀之

娥娥紅粉森鬢眉習成技勇何英爽天隕孤臣抱恨歸警仇欲雪生奇想雌季布今酒家傭柳花滿店香春風窈窕文聰壓曲檻穴容脰也三條通倭髻驅環挾錦瑟芙蓉笑壓葡萄浪濺器無人著憤鼻脫瑤露釧擊瑤鐘豔聲翼入倚虹殿戲圖斫繪藏霜鋒不見影纓見執袴紫騮嘶過垂楊路銀瓶索酒看羅敷霍奴惡趣蛾眉怒提投狗寶沸湯澆無能輾轉成涸鱗台座驚趨捉細腰街前早作岷崙度黨聚怨圍周觀者迴生愁從空斗一振鷹隼摩高秋飛揚出其外獨立神彌逾縱身搏擊復棖掉紛紛敗壞遺颺鐵錮

### 新纂雲南通志

卷四十八 地理考二十八 古蹟一

三

鸞失金約臂再櫻爛領遺焦頭詰朝羣惡思報賜屹然大樹空蟬蛻偶爾鄉人至正容難以戲背面拭啼痕咸識巧心伸大義陰謀不就遠離魂玉折蘭摧豈天意娘子軍氣凌雲夫人織錦特杆綠眉綠鬢繡能傳紅線紅綃劍可憐南中少婦真其侶國破家亡更豪舉烈骨長埋留玉顏未舒孤憤云胡死西門驛路通西山劫蘆寒起昆池烟夕陽衰草連重關斷垣高樹啼春鶉故老指言淚相續楊家小妹當壚曲

### 水雲鄉 在西湖明黔國公別業一名西園有樓名簇錦山茶樹

### 四面簇之故名又有魚池前賢題咏最多清一統志

### 何景明遊魚池

小岸城邊上輕舸一溪宛轉向魚池水藻濛濛荷葉暗掉入中流總不知

池邊三十五亭臺個個朱牕向水開亭下扁舟蕩雙槳打魚送酒幾回來

半竿斜日疏蒲明兩岸人語鳥不驚菱葉拂衣香袖舉秋風吹浪綵舟輕

三陣五陣打荷雨一點兩點照水螢笙歌留客不知夜燈火迴舟直到城

### 東西二寺塔 在城南里許其高相等唐元和三年大匠尉遲恭造

雲南清道光十三年地震東寺塔圯歷年議修未果光緒九年總督



岑毓英率士民移建於三皇宮前閱四年而工竣光緒志

道光志案大匠名尉  
遲恭韜府志脫韜字

雙白塔 在城之南一在覺照寺一在慧光寺相向而立蒙氏嵯顛

所建蓋自四方來者莫不遠見之亦雲南之望也景泰志

妙音講寺塔 在大西門外相傳唐尉遲恭韜建雍正志

梵字塔 在城東地藏寺周遭皆刻梵書詳金石上覆以閣雍正志清咸豐七

年兵燹燬光緒志

白塔 在城東三里通衢中元萬慶寺塔也後寺廢塔存雍正志清咸豐

七年兵燹折毀光緒二年糧儲道崔尊彝重修光緒志

穿心塔 在官渡其處有山周一里許皆螺殼積成居民平地掘井

深二丈餘亦皆螺殼並無雜土雍正志

新纂雲南通志

卷四十八 地理考二十八 古蹟一

四

大德寺雙塔 在城西祖遍山大德寺內明成化九年建光緒志

金蟬關碑 在城西羅漢山明楊慎書王褒移金馬碧雞文於上雍正志

道光志案明以後碑碣金石不載依舊志附列於記

螺峰刻石 螺峰在省城東北隅倚山建圓通寺頗多亭榭名人題

句甚多俱刻巖石夏桂洲有五言律一首鐫刻石上陳鼎演黔紀遊詩詳

金石

仙人弈棋石 在玉案山頂有石若棋枰其中凹處隱然類當時佈

子之所也傳昔有仙人弈棋於山蓋亦以其異而奇之也景泰志

劉真人符刻石 在縣東北龍泉觀刻於景泰六年龍泉觀長春真

人祠碑陰右有銘左題冲虛至道元妙無爲光範演教普濟長春

劉淵然書正書嘉慶三年戊午歲仲冬月吉日追泐下方刻莘田



華國才咏唐梅詩一首草書道光志

青靈內境坊 在城東東嶽廟內明嘉靖間建楊慎書清乾隆間重

修道光三十年邑人張耀倡修道光志

西寺坊 在城南西寺內明萬曆間建題曰共扶宇宙貝闕琳宮邑

人傅允孫書道光志

忠愛坊 在城南門外後因兵毀清康熙二十四年總督蔡毓榮巡

撫王繼文重建復傾三十四年總督王繼文巡撫石文晟重建雲南府志

嘉慶十八年火燬十九年總督伯麟巡撫孫玉庭重修咸豐七年

兵燹毀光緒九年總督岑毓英率官紳重建光緒志

金馬坊 碧雞坊 俱在城南門外丁亥年毀清康熙二十六年重

建雲南府志道光九年布政使王楚堂重修咸豐七年兵燹毀光緒九年

總督岑毓英率官紳重建光緒志

懷柔六詔坊 在城南門內清康熙二十七年督撫重修雲南府志原題曰

懷柔六詔平定百蠻道光八年布政使王楚堂重修改題曰天開

雲瑞地靖坤維同治十三年鹽法道沈壽榕重修光緒志

宣威萬里坊 在城南門外教場口清康熙三十年總督范承勳重

建雲南府志道光十三年地震傾圮現議修復道光志

萬壽無疆坊 在城內五華山拜雲亭前清康熙三十五年核減屯

額官民公建以申瞻祝焉雲南府志

野園 一名安阜園在城北道光志

侍讀昆明王思訓野園歌并序

吳三桂築野園滇城北以處陳圓窮極土木毀人廬墓無算以拓其地  
縉紳家有名花奇石必穿屋破壁致之雖數百里外不恤也歌以紀之



浮雲渺忽春城隈樂遊隨儗姑蘇臺夷光未去走麋鹿紅牆碧樹烏棲哀放登別苑千山擁鑿一池拋萬姓家畢穿舊室求瓊華妙選良家唱囉嘖樓閣峴峴海市連鳳笙龍笛圍紅鸞蛟宮深淺少人到長鯨醉倒軒狂瀾排山波湧飛衝碣竊弄衣冠猿戲譚雲暗瀟湘夜雨昏陽斷三聲淚空落澄懷坐嘯惟青苔滿天腥霧今塵埃亡魂徒結分香恨月冷荒臺覓燕釵

碧嶢精舍 在城西高嶢山

清一統志

明楊慎碧嶢精舍記

滇海西斥舍舟登陸俗曰高橋稽之古志橋實曰嶢以山形似秦嶢關受此稱爾高嶢與碧鷄相望如箭括毛沂東鎮氏有別廬在其下精舍之顏隸古定曰碧嶢他日有客愁獻疑於楊子曰茲嶢也沂知之沂號之如俗不知何易諸已諸楊子曰無易仍爾也君子期人以雅不以俗待人以博不以陋昔者孔子之作春秋也經書善稻吳名則伊緩也經書大原狄名則大鹵也經書紛泉狄名則矢胎也穀梁子曰號從中國名從主人范甯曰物類地形當從中國至於人名則從本俗楊子讀而詮之曰大哉孔子辨物正名與哉穀梁啓蘊發隱號從中國故去大鹵伊緩矢胎而從大原善稻紛泉也名從主人故介葛盧戎蔓子皆不易矣慎往年執簡史局網書藏室見洪武中有請以春秋兩漢地名驛詔既從其請史復書其事皇祖之謨春秋大復古之意也慎自執戟於滇每慨物類與地形失之陋俗若嶢嶢而為祿賤呂閻而為呂合金浪嶺之為丁當丁瀾滄江之為浪滄江也不止嶢之為橋耳方言既譌郡志踵謬豈君子雅俗而博陋之心必盛世一統而同文之義乎東鎮於春秋專門其學而又以世族閱閱子明習當世茲名也固雅俗博陋之濫觴辨物正名之卷石與因注而誌之者夫臨晚眺聽之美蒼蔚清冷之興卷中能賦者則備矣

蓮花精舍 在城北報恩寺內清康熙三十年總督范承勳建

雲南府志

佛海精舍 在城東歸化寺內清康熙三十四年總督王繼文建

雲南府志

新纂雲南通志

卷四十八 地理考二十八 古蹟一

六

停舟烟舍 在官渡村明楊慎遊憩之所每夏秋間登此以望高嶢

野水寒烟空漾沒蕩時見梵宇林臯在縹緲之際今遺址尚存

清一統志

聚遠樓 在城內五華山寺中日本僧曇演建以一覽滇南之景而

名都督沐晟重修樓北有泰然堂堂後有真意亭為滇人遊燕之

所

清一統志

和州潘仁聚遠樓

樓前風景似中華樓外峯巒際海涯遠近屯營諸部落高低花柳萬人家斷雲影接玄猿樹積水光連白鳥沙欲挽銀河兵甲洗相期穩泛月邊楂

南樓 在城南門內明西平侯沐英駐節於此題曰南樓望遠

清一統志

案景泰志南樓前黔寧王所建也重屋三層落成於洪武十九年題曰南樓望遠即今崇正門之城樓也劉有年作記

縹緲飛樓 在城西太華山麓明黔國公建

清一統志

鳳翥樓 在空谷亭後巡撫劉翹建

明通志



聚奎樓 在府學內巡撫侍郎都御史鄒應龍重修明通志

遙琴樓 在城北門內一曰眺京樓清一志

來爽樓 在城內菜海子北雲南府志

魚樓 在城北龍泉觀前清康熙二十九年按察使許宏勳題額曰

秋水為神即明末義士薛大觀闔家死節處雲南府志道光十二年總督

阮元重修道光志

迎恩樓 在城東重關清康熙三十三年總督王繼文重建儲蓄風

脈局固門戶通衢扼要也雲南府志

彩雲樓 在城東南隅清康熙三十四年總督王繼文巡撫石文晟

倡同八營副參遊守公建閣凡三層上奉昊天上帝中奉漢昭烈

帝關壯繆公張桓侯下奉諸葛武侯高峻宏敞維係風脈為水口

之鎖鑰作巽位之文峯登臨其上俯瞰一切滇中第一樓也雲南府志

大觀樓 在城西近華浦清康熙中建道光志咸豐七年燬於兵同治五

年署提督馬如龍重建十年後大水兩廊皆圯樓亦傾斜光緒九

年總督岑毓英重修光緒志

宸章閣 在府學內元建以藏璽書名御書閣後改曰宸章明沐晟

重修清一統志

尊經閣 在文廟大成殿前元大德元年頒降璽書號御書閣後改

宸章閣年久傾圮永樂十五年定遠王復鼎新之會朝廷頒降經

書適至因貯之於上名之曰尊經閣景泰志

流雲閣 舊名松子樓在城內祖遍山大德寺東其下即綠水河元

大德間梁王闕闕建正德間僧如慧重修雲南府志



桂香閣 在文昌宮為滇勝槩明通志

青雲閣 在縣學內巡撫都御史汪文盛建明通志

龍華閣 在崇正門外東寺內明通志

敬思堂 在滇城之中明黔寧王建景泰志

思召堂 在城西太華山下內有西平侯遺文滇人思侯如周人之

思召伯因以名堂明通志

可貞堂 在北門內節婦曹氏所居也道光志

明大學士長沙李東陽可貞堂記

滇南方節婦曹氏所居之堂曰可貞卿大夫士為其子矩名之者也節婦本宦家女歸方公公佩甫數年年二十九而寡舅姑老且衰諸子皆幼不更事家政義委節婦矢不二志去容飾薄滋味痛自摧毀紡績以供饋養凡喪葬婚嫁極力營辦不足則脫簪珥為之歷寒暑二十餘足不出房闈而事亦畢治蓋方氏世有武蔭公佩未及嗣長子政亦蚤卒至是次子敬襲指揮使敏義官而舉武矩習舉子業方嚮庸進節婦泣謂之曰吾不幸分當死所以不即死者以爾輩在爾輩各有成吾他日庶有以見爾父於地下也宏治初有司上其節下禮部覈實詔旌其門曰貞節後二年節婦亦卒年五十有三而已後敬以軍功進都指揮僉事獲贈公佩如其官節婦為淑人矩舉進士歷官禮科左給事中擢山東布政司右參議其一女適都指揮李增門戶貴顯倍於往昔而斯堂固存土

大夫又從而賦之至若干人余觀易之坤曰含章可貞可有二義不可不貞與如是而後可貞也地之承天機不外見而承載發育歸於有成非有貞固之德含蓄持守久而不變莫之能也節婦之志誠懇矣然使當時意氣決於一死則榮榮諸孤將無倚以為命况望其藝學之成就譽聞之輝赫家聲之昌且大如此哉此貞之德不可無而亦不易成也且敬之在帥閫方運籌効力期立功萬里外而矩又慎官守勤民事敷天子惠澤於一方文武之務各分其職殆無負乎為人臣者其有得於含章可貞之教矣乎余又聞公佩通書史敦行檢嘗遺金三百兩人稱其義而婦以節媳之有義節集行於世詩云刑于寡妻然則節婦之刑固於是在矩余禮部所舉士也請余記名堂之義故溯其所自出者言之

治兵堂 在城外東南隅清康熙二十八年總督范承勳建雲南府志

棲鳳亭 在城內明時黔國公沐崑建雍正志

明陝西提學信陽何景明棲鳳亭

將軍園中何所蓄十尺亭子四面竹亭中一榻千卷書將軍畫遊夜還宿元勳甲第高入雲珍奇異玩窮山陸將軍雅興不苟嗜只愛亭邊萬竿綠舊家風節傳累世見此勝如見喬木根株盤踞幾十年出地皆成老龍骨舊榦扶疏已作林新梢復見高於屋新梢舊榦森相向百丈空雲寒兀先公開圍一何動引水分畦費營築石間剛雨移紫瓊沙上耕烟長青玉至今遺愛思萊公萬古看詩想淇澳將軍能武兼能文展卷一目數行讀只今世守清白操春風如溫霜如肅開時高臥園之中此君亭亭對幽獨月軒夜坐呈夏簾風樹涼憑除暑服空明縹緲開笙竿戶牖清虛映鏡軸昆池歌動黃鸝高洞庭笛橫白雲哭瑤琴一鼓瀟湘亭冰綃再寫真蓄谷憶昨路經嶺激來佳植全稀多檉柳山深苦竹啼鷓鴣地僻松篁宿鹿鹿何期得到將軍園一洗胸中十年俗清農邀我促席看半日捲簾猶不足我聞竹生玉河湄開花結實鳳凰啄將軍文采真鳳凰凡樹安能動高目願將音響入簫韶奏我亭中棲鳳曲

清風亭 在按察司提學宅後明禮部尚書童軒為提學僉事時所



建有清風亭橋明通志

空谷亭 在桂香閣左明巡按陳察建明通志

拜雲亭 在城內五華山頂清康熙二十六年總督范承勳建為祝

釐之所雲南府志

月石亭 在城內螺山補陀羅巖兀然突出清康熙二十八年總督

范承勳建月石亭於上雲南府志

明晉寧唐堯官明月石

西南盛招提屹準惟螺峯捫蘿路詰幽陟磴臨蒼雲中仙梵響大士殿盤崇山茶窳如錦松柏翠烟籠夕景色已收明月升其東秀山一片石光彩照籠提賓主坐相酬子夜曲未終下方城郭近鑄騎且從容

晉寧唐祖命登月石亭

蒼崖千尺俯禪關欲上孤亭手自攀樹擁殘村斜照日烟浮滇海遠連山荒原寂寂銅駝冷野草青青戰馬聞今古滄桑成底事一杯濁酒醉愁顏

湧月亭 在滇池上流西湖近華浦清康熙二十九年巡撫王繼文

新纂雲南通志

卷四十八 地理考二十八 古蹟一

九

建雲南府志咸豐七年兵燹燬同治五年署提督馬如龍重建後傾圮光

緒九年總督岑毓英重修士民同住持僧性田續修東西廂房光緒志

碧漪亭 在菜海子中樓與亭俱清康熙三十一年總督范承勳巡

撫王繼文同建雲南府志

澹遠亭 在城北黑龍潭畔清康熙三十一年總督范承勳建雲南府志

浣玉亭 在城北陔山麓亭右匯水一泓冬夏不竭稍西引泉作數

曲可以流觴建屋三楹清康熙三十四年巡撫王繼文捐造顏曰

山水之間雲南府志

鬢鏡軒 在城西太華山佛嚴寺右清康熙二十七年總督范承勳

巡撫王繼文同建雲南府志

唐梅 在城東北龍泉觀內道光志今所存者為其孫枝採訪



宋柏 在城東北龍泉觀內道光志

拜佛石跡 在正覺寺某僧拜佛有年石陷雙足印今石猶存光緒志

一鑑亭 在城南香海庵清康熙三十年僧本元建范承勳題額昆明縣志

雄川閣 在城南二十里臨滇池上清康熙三十一年總督范承勳

巡撫王繼文重修今燬昆明縣志

眞武閣 準提閣 並在陞山鐵峯庵內昆明縣志

毘盧閣 玉皇閣 文明閣 並在官渡里妙湛寺中昆明縣志

一碧萬頃閣 大悲閣 並在太華山佛嚴寺內又有碧蓮石昆明縣志

舊石室 在羅漢山吳道士開鑿道光志案即雲華洞

新石室 在羅漢山邑人楊汝蘭捐貲開鑿道光志案即達天閣

飛雲閣 三清閣 玉皇閣 並在羅漢山妙定寺昆明縣志

新纂雲南通志

卷四十八 地理考二十八 古蹟一

一〇

古道茶亭 在歸化寺右清康熙三十年總督范承勳等建今廢昆明縣志

神驥亭 在城東金馬山神祠清嘉慶二十一年六營官弁新建光緒志

薛爾望故里 在東關外三綱祠旁薛家巷明末薛大觀宅光緒志

詩塚 在太華山清咸豐六年侍郎黃琮葬並記僧巖栖勒石記云

嗣音集稿本皆琮所書既登梨棗猶以前哲遺墨不忍燼之爰葬

諸太華之山而爲銘曰鬱鬱佳城羣巒作輔窮達一邱翰墨千古

士爲國光桑梓所望兼之不朽何假詞章遇蹇才豐實多往哲短

詠長謠一腔心血壽諸劄劄遺草斑斑卜云其吉藏之名山光輝

莫遏騰耀郊野碧形似雞金形似馬其氣上升結爲彩雲傍植文

梓下座香芸於以封之如山岌義我爲斯銘配文泉子光緒志

玉璽 清光緒丙午年各省辦學堂吾滇就高等學堂改設兩級師



範學堂建講堂於五華山頂偏西原有小池當設高等學堂時曾稍加修濬總教習陳榮昌題曰蓄龍池並立石記之洎建講堂乃折地四周之石以填之當折石之際於池底汗泥中發現二物一玉璽方五寸有奇篆刻朱文曰救命之寶長紐質為碧玉為工人掘破矣一楠木匣長三尺闊三寸高二寸許工人意內必蓄重寶也即隱之及啓視中有三物一大理石肖像一絹畫美人一幀一函件為陳圓諫吳三桂書工人懊喪乃出售於古董李某李亦等閒視之時本邑前訓導楊鑑清太和舉人在側見之李因質之楊佯以偽物告既而卒以賤價得之此三物遂歸楊惟玉璽一方上之總督錫良旋存之庫今存雲南博物館採訪

### 富民縣

新纂雲南通志

卷四十八 地理考二十八 古蹟一

一一

### 秦臧廢縣

在富民縣漢置屬益州郡晉屬晉寧郡宋齊因之後廢

復置屬昆州唐天寶中入於南詔

清一統志

響石 在城東八里石色蒼碧狀如馬鞍擊之有聲土人謂之石鐘

石鼓

雲南府志

旁有民居名石鼓村

富民縣志

### 諸葛營

在縣南小石嶺

清一統志

蜀漢諸葛亮南征時嘗置營於此今名

諸葛營

雲南府志

### 昆明戴綱孫諸葛營

長天萬里鶚橫霧北風吹折將軍樹黃沙莽與暮雲屯是當年駐師處丞相聲名滿人口功蓋三分古罕有大江南北作戰場英才吳魏什八九後人抵死罵阿瞞老賊賊漢漢業殘苟或陳琳盡鷹犬誰識草廬有龍蟠中山帝胄居拊髀三顧深恩始一起天險南來開劍門感君付託許君死瀘江五月軍南征壁壘窺見殊分明戟門朝肅蛇鳥陣銅弩宵寒驚鶴聲南人不反遂北伐二表出師氣彌烈野老安知籌筆心抵掌夕陽淚痕熱

### 醒心亭

在飛翠巖

富民縣志

### 飲虹亭

在永定橋

富民縣志



楊搗秀飲虹亭

孤亭臨絕澗時見此漣漪隔岸千峯出中流一柱支打艇花雨急拂檻柳烟遲忽起伊人慕遙遙寄所思

鐵鎖橋故址 俗名舊板橋在成器登村彝扎郎水洞溪水交匯處

建自元初形家以為鐵鎖扁舟其實則東北沿村赴黎灤城舊道

清咸豐間橋燬惟岸石猶存光緒志

環翠樓 在縣署內光緒志

映月亭 在永定橋飲虹亭對面光緒志

南居亭 在九峯書院內為諸生講學處清乾隆間知縣李登瀛建

光緒志

桂香閣 在湧泉庵左中塑文昌像即洞溪之源光緒志

宜良縣

新纂雲南通志

卷四十八 地理考二十八 古蹟一

一一一

大池廢縣 在今縣城東清一統志元憲宗六年立大池千戶隸嵩明萬戶

至元十三年升宜良州治大池縣後廢大池來屬元史地理志

大赤廢縣 在今縣城西元置縣後為赤水湖巡司移入昆明縣界

清一統志

宜良廢所 在縣城西明洪武二十四年建清康熙五年省清一統志

仙人洞 一在縣東南射雞村山畔內有石龍石馬等物雲南府志一在巖

泉山後李破罐所居宜良縣志

諸葛營 在縣南城外自小石嶺至中營地址方五里雍正志今五聖宮

文昌宮亦其遺址宜良縣志

弘教院 在寶洪寺側廣昱法師創建始於明萬曆壬子春成於天

啟元年辛酉冬棟宇寬敞現尚完好採訪



忠烈墓 在吳家營西北清咸豐十一年路南夷匪作亂攻破吳家

營合村屠殺事後收殮共得一百七十四人合為一墓探訪

古茶花 在湯池木希村後西華寺距城三十八里有紅茶花二株

一單瓣一複瓣根徑大一尺七寸高三丈餘尺相傳為明初所植

現尚繁茂每年可開花數千朵探訪

古燈 城北四十里溫泉寺有篋製燈籠一對圓形徑寬一尺八寸

高二尺不用紙糊風不能入燃燭其中滿現菊花燦爛輝煌相傳

為清嘉慶年間本縣瓦倉人趙小斗所製現尚完好探訪

古槐 在城南四十里白蓮寺大可三人圍清乾隆間即採入縣志

現尚青葱可愛探訪

### 羅次縣

新纂雲南通志

卷四十八 地理考二十八

古蹟一

一一一

朝陽洞 在西山左洞門向東日出則照滿石室洞下有龍湫其水

瑩潔有靈氣常有異人居之羅次縣志

響洞 在朝陽洞左其深莫測投之以石丁東之聲移時不絕羅次縣志

月石 在嵩華山左嶺有石一片遠視如明月夏秋益朗

象石 在城南六十里澤潤里大路有巨石立陡坡間高丈餘長二

丈餘鼻長數尺頭朝昆水足立磐石遙而望之生氣凜凜如虎踞

然因呼為象石道光志

金水井 在金水鄉其水清瑩澄澈時見金光羅次縣志

黃龍寨 在城西北二十五里相傳元梁王屯糧於此雍正志

煉象關石壁鐫字 在城西南一百二十里石壁上明崇禎間鐫天

子萬年煉象雄關八字羅次縣志



魚跳龍門 在城北五十里許乍鳥河中有橫石一道高丈餘闊尺

許水從中流狀如龍門每雨初晴河魚踴躍而上觀者奇之道光志

草蒲團 在城南二十五里馬街靈通寺後平地上草結三蒲團形

秋冬不枯道光志

### 晉寧州

滇池廢縣 漢置屬益州郡梁以後縣廢雍正志在今城南玉案山採訪

晉寧廢縣 在城西二里唐武德中置蒙氏廢為陽城堡雍正志

大甫廢縣 在城南二十里元至正中置縣尋省入州清一統志

樹泉 在州城北天王廟樹心空虛三尺許中有清泉相傳可療目

疾晉寧州志

瓦柱礎 在萬松寺大殿南一柱礎以碎瓦攢成支殿之東角潤則

### 新纂雲南通志

卷四十八 地理考二十八 古蹟一

占雨晉寧州志

琪花樹 樹在天王廟前入冬始華三色相間雍正志

忽納寨 在州西清一統志明洪武十四年傅友德等入雲南元梁王孛羅

走晉寧州忽納寨赴滇池死即此地雍正志

梁王故宮 在城西十里光長山元末梁王自鄯闡奔海島設宮於

此久廢晉寧州志

鳳集坊 在城中相傳有鳳集此故名久廢今重修晉寧州志

十二樓 一景賢一節義一鎮寧一阜安一望滇一保民一奉節一

綏遠一廣樂一廣德其二則桂香也皆知州喻敬建今廢晉寧州志

土星樓 在城正中明時建鎮寧樓久圯清乾隆二十六年署知州

朱陽率紳士重建更名中央閣晉寧州志



望海樓 在城西河泊所村人建傍海而樓窗牖四達俯瞰烟波萬

態彷彿岳陽之勝師問忠有詩晉寧州志

四通亭 在四通橋知州趙時雍建黃明良有記晉甯州志

長坡亭 在長坡橋知州喻敬建晉甯州志

石牛 在城西十里景泰志

蛇象石 在牛戀鄉西路左右一石如蛇一石如象兩兩相望光緒志

仙人洞 在城西南十里巉巖峭壁上有石室更上有樓寬平可席

三十餘人壁有題詠剝蝕不可讀相傳為元人手筆巖畔有泉不

時潮湧人呼為仙源光緒志

金砂寶嚴寺大佛像 在晉寧金砂村寺為元至元間建正殿內供

有金身大佛一尊高丈餘莊嚴古雅塑工精絕為近來所罕觀者

採訪

盤龍山華嚴閣十八羅漢 閣為明崇禎初年建正殿內供奉觀音

三大士兩傍配以十八羅漢塑工高超神情畢肖稱為絕妙採訪

盤龍山蓮峰祖師殿燒香庫 庫為清康熙年間建概用青砂石甃

成形式古樸每方刻人物花草精妙罕匹採訪

元梅 在盤龍山大雄殿盤龍山紀要

元茶 在盤龍山藥師殿盤龍山紀要

天池 在大樸樹村石山之巔水深不可測雖旱潦無殊光緒志

三山九井 百花螺髻鳳凰三山有九井今存其七一日功德在法

輪寺二月初六日佛會汲之徧灑城中以除疫癘一日觀音在南

關內觀音閣前一日如意在如意宮一日天仙在天仙宮一日帝



釋在忉利宮一日天王在天王廟後一日龍井在龍井廟前水皆  
清冽盛暑不竭光緒志

詩廬 在晉寧城西北里許之鷓鴣廠方夢亭建採訪

### 呈貢縣

歸化廢縣 在呈貢縣東南清一統志元憲宗六年分隸呈貢千戶至元十

三年立縣元史地理志清康熙七年省入呈貢縣雍正志今為歸化村呈貢縣志

歸化知縣何玉楨歸化村

駿馬嘶金勒行行走石城雨花春樹淡月角晚風輕  
水繞靈源秀山環杜曲晴安江波不起海宴樂昇平

仙人洞 在白龍潭山腰怪石參差洞高數尺中可列坐門有平石

一片俗傳仙人著棋處呈貢縣志

觀魚亭 在城東白龍潭下明萬曆三十五年邑人李復宗建雲南府志

蓮花池 在城東十五里月角山上有石城尋曲徑而入洞高數丈

層巒疊翠石柱石門皆天造不假人力洵為邑中奇勝呈貢縣志

### 安寧州

三泊廢縣 在城南三十里元至元十三年置康熙十八年省入昆

陽州雍正三年以其地歸安寧址存雍正志

石虎頭 在城北虎邱山一幹皆土有石昂出如虎頭其石高不可

上有梵字石碑鎮之安寧州志

曬經石 在法華寺後石壁矗立高數丈巔頂石刻梵字數行不知

何代人手跡安寧州志

五老石 在太極山半其四環立如老翁偃僕作諦視狀一則枕老

梅中立淡惹殘烟冷香披拂即石竇雪梅也人謂之五老觀太極



張碧泉咏云登峯不遠昊天闕入道須尋無極翁道光志

接天石 在高山前怪石嵯峨形如獅象層架疊峙高逼雲端莫敢

仰視洵為異境安寧州志

葱山頂水池 山高八百餘丈頂有大石自成窪罇中藏尺水歷年

不涸飲盡復出甘冽異常安寧州志

洗墨池 在城北門明楊慎洗墨於此雲南府志

畫壁 在太極山北極宮前都雷殿昔有道人攜絮纒蘸墨塗印兩

壁各成形像有如入定僧如偃僂翁如落拓高士如蹢躅酒徒麻

衣蓬首蕭散縱橫皆極天趣相傳為張顛遺跡近為俗工剷去聖

以粉道光志

臥佛 在法華寺真空庵之下鑿石為之長二丈餘南詔紀先是金

葉楊宜所建被火公主段氏延壽姐更建氏佛郎天王楊凌之妻

也旁石壁鑿羅漢十八安寧州志明楊慎有詩題於其側雲南府志

無名樹 在溫泉古石崖上葉如黃荅花如秋桂枝如鳳竹軟而縹

根如龍松蟠而曲綠幹青莖春華秋馥四時蒼翠霜雪不凋安寧州志

古柏 在學宮丹墀中左右二株皆圍丈餘高百尺千餘年物也標

星門左右二株種異而形同鬱葱之氣實為學校大觀安寧州志

靈通關 在城北二里許即松華閣朱岱晟先生致政歸攜梵書讀

於此道光志

文筆 在城東五里與學宮門對磚甃嵌狀如浮屠安寧州志

清禪塔 在城西北十里曹溪寺之右即聖水三潮處雍正志

妙果寺中殿 棟宇宏敞係用木疊架而成全無釘楔之跡安寧州志



仰翁樓 原名碧玉在溫泉提學胡仰齋重建明楊慎雅慕之因易

曰仰翁今廢道光志

明楊慎碧玉樓

碧玉泉邊碧玉樓崇幽何羨採真遊清秋長嘯驚山鳥朱夏閒眠對水鷗  
孺子滄浪殊濯足高人刻曲漫迴舟衰年七秩重來此曩昔相知半白頭

遙岑樓 在城東為迤西咽喉明楊慎嘗講學於上顏曰文獻名邦

題曰相業四朝稱第一人文六詔羨無雙道光志

明大學士新都楊廷和留遙岑樓寄王白庵太守

寄謝安寧賢太守遙岑新建慰吾兒紫雲宮闕回瞻處錦里江山入望時  
不羨己公茅屋賦無煩錄事草堂賞投壺散帙皆餘事又是南州一段奇

升庵洗硯池 在安寧北門內現存採訪

湯新樓 在溫泉久廢道光志

明楊慎湯新樓

新纂雲南通志

卷四十八 地理考二十八 古蹟一

一八

偶乘清興泛仙槎三月春殘滿樹花石壁倒懸惟鳥道竹林深處有人家  
直登絕頂疑天近曲轉迴廊覺路賒勝地淹留陪酌久短橋回首夕陽斜

榜花樓 在曹溪寺側護花山房北段所偕弟曦讀書於此道光志

拱華樓 即州東城樓道光志

明大學士州人楊一清拱華樓

燈水潺潺不斷流白雲芳草帶斜舟坐來山色無餘地占盡風光是此樓  
雞嶺夕陽高樹合石橋新雨落花稠也知看竹須乘興不用東君掃榻留

悠然亭 在州境明楊慎建道光志

明給事中太和楊士雲悠然亭

聞道西來金馬客卜居正對碧雞山玉堂舊夢鶯花裏白鶴遺蹤紫翠間  
流水捲簾心共遠片雲倚枕意俱閒陶情不作離騷賦指日君王定賜環

真空亭 在法華寺上憑欄眺遠色相虛明楊邃庵請假歸里遊於

此題曰萬事都歸幻浮生本是空亭今廢址存道光志

溫泉 在城北十五里螳螂江上山環水抱巖石玲瓏其水清潔味



甘如醴光緒志

暖谷 雲窩 並在城北十五里暖谷洞深里許暖氣薰蒸相傳為

火龍洞即溫泉來脈處雲窩洞外常有雲氣望之可以占歲多旱則雲瑩皎多雨則雲黳黳晴雨均則雲現彩清康熙間巡撫石文

晟題額光緒志

土仙 在城南白登村大澗中有土山俗呼王祥子亦呼土仙人不

生草木連起二峯一高一俯儼似人形首如戴笠狀光緒志

古樾 在城南相傳為明都指揮楊姓所植根株盤露身大六七圍

其質堅其根固未春枝葉先發既冬凋謝獨遲光緒志

石鐘鼓 在城南崖泉寺旁洞中諸石奇怪萬狀有石鐘一石鼓一

叩之則鳴其聲清越光緒志

黑牛井 在城南大雲山石上有水一窪其味如滷光緒志

祿豐縣

石牛 在西隅山兩山並峙中通衆流雲南府志

化牛石 俗呼米苴石形狀蹲峙宛如牛形與西隅山石牛相類雲南府志

大井 在東街劉真人遺跡祿豐縣志

淨蓮寺泉 僧量海遺跡祿豐縣志

飲馬坑 在城西北金山相傳為孔明駐師飲馬處雲南府志

九石攢梅 在城東二十里東華寺岡巒險峻映帶流泉旁有九石

羅列中有石坪如案山梅挺生無栽植痕迹祿豐縣志

雙柏 在二鄉俗名米槽建有靜樂庵殿前古植雙柏葉密枝交參

天籠日祿豐縣志



諸葛臺 在城西三里武侯南征凱旋駐軍於此雍正志

文筆 在城東掛榜山明萬曆甲寅原建於古文廟之前久廢僅存

址清康熙四十四年紳士捐貲重建蘇豐縣志

石雲庵 在縣東樹林繁茂內有石巖清泉岩前建觀音寺巖下建

靜樂亭石門亦樂亭就清泉匯流處砌成九曲池旋窩塘以供游

觀採訪

### 昆陽州

望水廢縣 在縣西唐武德七年置南龍州貞觀十一年改鉤州治

望水縣兼領唐封一縣尋廢明通志

河西廢縣 在城西河西鄉元至正間置尋省入州雍正志

落洞泉 在城西五里水沸騰汨汨有聲康熙志

新纂雲南通志

卷四十八 地理考二十八 古蹟一

一一〇

古柏 在城西門內城隍廟大樹圍高十餘丈傳為宋時高氏植雍正志

萬戶井 在由義坊宋時鑿泉水騰湧盛於他井光緒志

里仁井 在循禮坊味極甘冽光緒志

三洞泉 在平定鄉石洞有三泉皆清潔可鑑毫髮最為奇觀光緒志

古龍泉 在城西二里新城內光緒志

熱水塘 在城北四十五里滇池旁白魚口水氣溫暖漁人多取浴

焉光緒志

問松石 在月麓山桂香閣後茂林修竹半壁撐天遨遊其間有超

然塵外之意名人題詠刻石以紀其盛光緒志

升庵碑 在城西三里普照寺毘盧閣其文蒼老古茂無枝光緒志

翻水洞 在石頭山水沸如湯深不可測光緒志



白雲洞 在城西四十里些溪渡清康熙二十三年道人陳太熙曾習靜於此光緒志

護松臺 在城內月山腰明嘉靖間李資坤讀書於此因築臺焉今

廢光緒志

憩園 即護松臺舊址其初為尙文教授鄉人處中有醉樵草堂堂

前有坊題曰雲氣蒼然光緒志

可吾書室 在治安門內李舜耕建今廢光緒志

白鶴山房 在慈照寺右李鳳翔建光緒志

文筆塔 一在天馬山清嘉慶三年知州杜均解理協同邑紳李文耕等新建今存一在望州山一在李官村一在文筆山均明時建

久廢光緒志

易門縣

舊縣治 在今縣南三十里明洪武二十四年建易門守禦千戶屬雲南都司築城戍守萬曆三年遷縣治於城之內云元志縣之西有泉曰洩源俗訛曰易門明通志

龍泉洞 在大龍泉山下軒豁幽朗懸英垂乳嵌空玲瓏擊之清響有如鐘磬泉自洞中湧出幽深莫測好事者然炬尋源離奇萬狀竟日未窮其所止洞左一竅斜通山巔曲磴而上別具一天上建大悲閣古佛閣雲南府通判胡允瑞塑呂祖像於巖上洞口舊有古梅一株橫臥水際流經其下清香襲人清乾隆三十四年洞口鑿池累石建亭增修益備名人題咏甚多易門縣志

仙人巖 在縣北十里轉灣坡後峯巒石壘下有空嵌古洞曲折幽



深洞中苔蘚碧如垂柳石痕列如田常傾出清泉僅一勺之多牧

童爭飲涼如瓊漿

易門縣續志

珍珠泉 在縣東南五里小南山下泉水清溫有泡自底滾出纍纍

不絕如珍珠然

易門縣志

滴乳泉 在治北四十里天然寺極幽靜後有懸巖古洞洞中倒懸

乳竇滴水夏涼冬溫以器盛之可供僧飯

易門縣志

吳家井 在城東水甘冽可以消癭

雲南府志

石柱 在城西三十里黎崖山山形似馬首夷賊每出入劫掠必祭此山明萬曆中巡撫鄒應龍按部至此時自甸末至營峩二百里間諸夷皆叛應龍殺一賊首並馬首瘞之豎石柱於上表曰此後賊不祭自是叛者悉附村民神而祀之於柱後建八角亭今亭廢

新纂雲南通志

卷四十八 地理考二十八 古蹟一

一一一

柱存

雍正志

阿烏砦 在城北八十里四圍峭壁莫能攀躋向南有石門瀉出清

流危磴盤旋僅容一騎昔酋長阿烏據之

雍正志

安堵寨 在三股水石山屹立如烏頭清康熙四年土酋王耀祖叛

陷城野賊乘隙劫掠迷末西山芹菜塘黃草嶺諸村民共作石壁

於山巔避之至今尚存

易門縣續志

石柱亭 在縣治黎崖山頂明隆慶六年巡撫鄒應龍建今遺址尚

存

雲南府志

寺產銅像 縣北四十里有天然寺在半山巖間明洪武中就寺內

所產銅鑄佛像十餘今尚存

採訪

魚化石 在城南六十里腳家甸村人採石於山得一石赤而澤剖



之中有三魚鱗鱗宛然珍而藏之今得半塊置於教育局採訪

### 嵩明州

楊林廢縣 在城南三十里古今圖書集成今為楊林村城隍祠尚存嵩明州志

邵甸廢縣 在城西四十里清一統志元憲宗七年立邵甸千戶至元十二年改為縣

元史地理志明成化中省入州明一統志舊址在腰站屯後復築城於

白邑村以防東賊太守許立禮鐫古郡新城四字於石今城址猶

存嵩明州志

古河泊所 在城南十里嘉麗澤東北嵩明州志

八仙石壁 在城北五里明初州人施墨山寫八仙像於石壁今墨

跡宛然嵩明州志

花石洞 在城北五里出五色花石沉浸水內溫潤有光道光志

新纂雲南通志

卷四十八 地理考二十八 古蹟一

一一二

秀崧僧泉 在城東三十里壽國庵其庵無水僧道心祈禱得泉其

徒本悟於邵甸普賢寺亦祈水有泉今稱石倉嵩明州志

道光志案嵩明州採訪邵甸四景南倉在普賢巖下其額曰天賜泉

平陽碣石 在城東二十里阿古龍大小村石骨清奇石龍以此得

名前多螺阜建淨照庵鎮之道光志

盟蠻臺 在州治南清一統志嵩明州昔漢人居之後烏白蠻強盛漢人徒

去盟誓於此因號嵩盟今州南有土臺會盟處也元史地理志

馱馬坪 在城東三里元高阿况騎射處今址尚存嵩明州志

梭沙坡 在城東南三十五里沙橋旁其地多沙從山穴中流出明

使臣吳雲遇害於此嵩明州志

得食村 在城西三十里邵甸世傳明建文帝至此饑甚有田夫獻



食帝喜曰得食矣遂以名村嵩明州志

毒泉碣 大鼎山有海潮寺在嵩明州東三十里去寺半里有毒泉碣云此係毒泉

飲者傷生陳鼎演黔紀遊旁注萬曆庚子歲飲者連斃二人奉按察司江立

表識之二十字嵩明州志相傳有奇樹生于此名曰白鶴香每歲花時各

山毒蛇鳩鳥皆集樹下泉流其旁人飲輒死今樹已伐行者猶相

戒焉演行紀程

道光志案按察司汪名和鄱陽人萬曆間副使

乞降碑 在城東十五里明萬曆三十五年何源金為貴等與叛賊

楊禮戰勝之賊乞降因立石今碑猶存嵩明州志

振遠亭 在城南門外明萬曆十三年知州余化龍建塔於此後圮

清康熙四十五年署知州魯朝俊就其址建亭代之四十九年知

州吳寶林肖許旌陽像於亭樓嵩明州志

瓊宇亭 在州治法界寺左環山繞水州人每憩其間雲南府志

嵩靈山大石 在橋頭村後高二丈餘上銳下圓俗傳登之可見滇

池光緒志

牡丹石 在城東三十里質赤長四尺寬二尺內印墨跡牡丹大小

可辨傳為耿仙坐臥遺跡云光緒志

天化宮石鳳 在城南十五里形像宛然光緒志

翠峯庵石獅 在城南四十里其形如生光緒志

古柏 在黃龍山宗鏡寺殿前光緒志